

Filemon

Filemon hitte Pol beleŋ asaŋ kaŋ unyiŋ

¹⁻²Be, nebe Pol, Yesu Kristu niŋ teŋ gago koyare hime. Irdeb kadniniŋ Timotiya dufay unŋkureŋ po kerdeb asaŋ gago kaŋ hime. Asaŋ gabe ge Filemon niŋ kaŋ hime. Irdeb babaniniŋ Apiaya Aksipusya irde Yesuyen alya bereya gere yare gabu irde haŋyen goyen goke manaŋ kaŋ hime. Filemon gebe kadniniŋ wor po, irde meten kadniniŋ manaŋ.

³Be, Adoniniŋ Al Kurunya Doyaŋ Al Kurun Yesu Kristuya beleŋ bunineŋ dirde igiŋ igiŋ dirde bitiŋ yisikamke igiŋ hiwoŋ yeŋ gusaŋaŋ yirde hime.

Filemonyen mata igiŋ

⁴⁻⁵Be, Filemon, nebe ge beleŋ Doyaŋ Al Kurun niŋ dufayge saŋiŋ irde Al Kurunya alya bereya niŋ amaŋeŋ nurde yuneŋ hayen goyen gote mere momoŋ nurde himyen. Niŋgeb Al Kurun mere irde heŋyabe goke teŋ ge niŋ dufay heŋ Al Kurun igiŋ nurd uneŋ himyen. ⁶Irde Yesu Kristu niŋ dufayge tareŋ irariŋ go hende harde detge yade al hoyaŋ faraŋ yurde hiwoŋ yeŋ Al Kurun gusaŋaŋ irde himyen. Gogab neŋ Yesu Kristuyen alya bereya gayen Yesu Kristuya hiteke Al Kurun beleŋ guram dirde tareŋ dirtiŋ bana ha goyen ge wor keŋkela bebak tiyayiŋ. ⁷Be, kadne, ge beleŋ Al Kurunya alya bereya biŋ yurum yirde tukaŋ geb, go nurdeb ge beleŋ kadge yago niŋ amaŋeŋ nurde yuneŋ ha yeŋbe bener mat amaŋeŋ wor po nurdeb saŋiŋ heŋ hime.

⁸Niŋgeb det kura goke gusaŋaŋ girenŋ tihim. Nebe Yesu Kristuyen mere basaŋ al geb, gusaŋaŋ heŋ heŋ ge kama ma heŋbe ge beleŋ mata titek goyen igiŋ gwaha gwaha tiyayiŋ gintek hime. ⁹Goyenbe ge niŋ amaŋeŋ nurde gunenŋ hime geb, gago eseŋ mere girtiŋ yara girde hime. Ne Polbe alik himiŋ. Gega Yesu Kristu niŋ manaŋ teŋ koyare gago hime. ¹⁰Niŋgeb ne al gahade gare Onesimus niŋ teŋ gusaŋaŋ girenŋ tihim. Metenŋ alge

Onesimusbe koyare gar himeyabe kenen Yesu niŋ momoŋ irmekeb mata bulunmin yubul tiyuŋ. Irdeb Yesu gama irde hi geb, urne yara nurde unen hime. ¹¹Hakotbe keŋkela ma metenŋe ten gunen hinhin. Goyenpoga haŋka gabe meten igiŋ tiyen, irde geya neya tumŋaŋ faraŋ duryen. ¹²⁻¹⁴Niŋgeb Yesu Kristu niŋ yitiŋ mere igiŋ goke ten koyare hime gayen ge belen faraŋ nurtinenbe yen belen gere gasuŋ ten faraŋ nurwoŋ yen nurdeb basiŋa ire yen nurmin. Goyenpoga dufaynerbe gigen, “Igiŋ faraŋ urayiŋ,” inke gab faraŋ nuryenbe igiŋ yen nurde hime. Gogab ne belen gwaha tiyayiŋ ginmeke ma tiyayiŋ, gigen dufayger nurde tiyayiŋ. Goke tenbe Onesimusbe bubulkunne wor po yen nurd unen himyen gayen ge hitte ten kermeke mulgaŋ heŋ kuyen.

¹⁵Be, Onesimus gayen Al Kurun belen ge hitte mat ten belen muŋ po hoyande tukun gobe kame ge hitte mulgaŋ heŋ kun geya huginen heŋ heŋ ge ten gogo gwaha irun daw yen nurde hime. ¹⁶Niŋgeb gaha naŋabe meten al dulnen yara moŋ, al gwahade gote folek, kolge gigen wor po yara nurde unen hayiŋ. Nebe keŋkela ma nurd unen hinhem gega, gayenterbe amanen wor po nurde unen hime. Munan gebe keŋkela nurde unen hinhan. Yenbe meten alge, irde Doyaŋ Al Kurun niŋ tenbe kolge yara hiyuŋ geb, yen ge amanen nurde hayiŋ gobe ne belen yen ge amanen nurde unen himyen gote folek yen nurde hime. ¹⁷Niŋgeb ne gayen meten kadge yen nurde nunen ha kenem ne gargar nirde hayen gwahade po, Onesimus wor gargar irayiŋ. ¹⁸Irde yen belen mata bulun dahade kura girtiŋ daw ma horage gwahade kura yawartiŋ kenem goke wol heŋ heŋ ge gusuŋaŋ ma irayiŋ. Ne ninke gab wol heŋ gunen. ¹⁹Mere gabe ne Pol nigen hanner wor po kaŋ hime. Niŋgeb Onesimusyen kanduk goyen tenbe ne belen horage goyen wol hewen ginen hime gayen fudinde yen nurayiŋ. Goyenpoga nebe Doyaŋ Al Kurun niŋ momoŋ girmeke yen ge dufayge tareŋ irdeb Al Kurun urmin hariŋ goke wol hawayiŋ ma ginen. Niŋgeb ge wor Onesimus belen kanduk guntiŋ goke ma nurayiŋ. ²⁰Niŋgeb, kadne, Onesimus gayen ge hitte kukeb igiŋ igiŋ irde hiwoŋ yen nurde hime. Gwaha ten hayiŋ gobe Doyaŋ Al Kurun niŋ ten ne faraŋ nurde ha yen nurd gunen. Gusuŋaŋ girde hime gayen igiŋ nurayiŋbe Yesu Kristu niŋ ten tareŋ nirde ha yen nurd gunen. ²¹Nebe mere girde hime kurun gayen fudinde wor po gama irayiŋ yen nurde hime. Irde go po moŋ, det hoyan manan irde nuntek girde hi gobe nurde hime.

Mere funan

²²Be, det kuran sopte gusuŋaŋ giren tihim. Ne niŋ ten Al Kurun gusuŋaŋ irde hayen gobe Al Kurun belen wol heŋ gunen nad nerke ge hitte kwen yen nurde hime geb, yager gasuŋ kura tubul ten nunke hiyen. Gogab kun gor ferde heŋ. ²³Be, Epafraŋbe Yesu Kristu niŋ ten neya tumŋaŋ koyare gar har. Yen wor ge niŋ dufay heŋ hi goke momoŋ irayiŋ

ninkeb gago gineŋ hime. ²⁴Irdeb yeŋ po moŋ. Meterŋ kadne yago Mak, Aristakus, Demasyabe Lukya wor ge niŋ dufay heŋ haŋ.

²⁵Be, Doyaŋ Al Kuruŋ Yesu Kristu beleŋ bunineŋ dirde igiŋ igiŋ dird dird gobe geya hiwoŋ yeŋ gusuŋaŋ irde hime.